



ALL INDIA RADIO, SILCHAR

MORNING NEWS BULLETIN

BENGALI/বাংলা

9 APRIL 2024

7:35—7:40 AM IST

নাগরিকত্ব সংশোধনী আইন (সি এ এ) কার্যকর করার ক্ষেত্রে কেন্দ্রীয় সরকারের জারি করা বিজ্ঞপ্তির বৈধতা সম্পর্কে আজ সুপ্রিমকোর্টে শুনানি গ্রহণ করা হবে । কেন্দ্রীয় সরকারের গত ১১ ই মার্চ জারি করা নির্দেশাবলী স্থগিত রাখতে আসাম সম্মিলিত মহাসংঘ সহ বিভিন্ন পক্ষের দাখিল করা ২০ টি আবেদনের পরিপ্রেক্ষিতে এই শুনানি গ্রহণ করা হবে । উল্লেখ্য সুপ্রিম কোর্টে নাগরিকত্ব সংশোধনী আইনের বিরুদ্ধে ২৩৭ টি মামলা বিচারিধীন রয়েছে ।

আসাম পুলিশ অপরাধীদের বিরুদ্ধে তৎকালীন ব্যবস্থা গ্রহণ করার জন্য শীঘ্রই ১০২ সেবা আরম্ভ করবে । টোল ফ্রি এই নম্বরে ফোন করলে আসাম পুলিশের লোক ঘরে গিয়ে অভিযোগের ভিত্তিতে এজাহার গ্রহণ করবে । মুখ্যমন্ত্রী ডঃ হিমন্ত বিশ্বশর্মা জানান যে পুলিশের ১০২ সেবার হেড কোয়ার্টার দেবগাঁওয়ে স্থাপন করার প্রস্তাব করা হয়েছে । এই সেবা প্রবর্তন করা হলে জনসাধারণকে এজাহার দাখিল করার জন্য থানায় যেতে হবে না এবং চুরি , ডাকাতির মতো ঘটনার ক্ষেত্রে ১০২ সেবায় ফোন করলে পুলিশ ঘটনাস্থলে পৌছবে ।

রাজ্যে দ্বিতীয় পর্যায়ের লোকসভা নির্বাচনের মনোনয়ন পত্র প্রত্যাহারের শেষ দিন গতকাল একজন প্রার্থী মনোনয়ন পত্র প্রত্যাহার করেছেন । এর ফলে রাজ্যে দ্বিতীয় পর্যায়ে নির্বাচনী ময়দানে ৬৪ জন প্রার্থী প্রতিদ্বন্দিতায় রয়েছেন । ডিফু আসনে একজন প্রার্থী মনোনয়ন

প্রত্যাহার করে নিয়েছেন। উল্লেখ্য দ্বিতীয় পর্যায়ে শিলচর, করিমগঞ্জ দরং - ওদালগুড়ি, ডিফু ও নগাও আসনের জন্য এখন ৬৪ জন প্রার্থী ময়দানে রয়েছেন। এই পর্যায়ে বিজেপির হয়ে শিলচর আসনে পরিমল শুরুবৈদ্য, করিমগঞ্জে কৃপানাথ মালহা, দরং - ওদালগুরিতে সাংসদ দিলীপ শইকিয়া, নগাও-এ সুরেশ বরা ও ডিফুতে অমর সিং প্রতিদ্বন্দিতা করছেন। অন্যদিকে নগাও এ কংগ্রেস দলের প্রদ্যুৎ বরদলৈ, শিলচরে সূর্যকান্ত সরকার, করিমগঞ্জে হাফিজ রশিদ আহমেদ চৌধুরী, দরং -ওদালগুরিতে মাধব রাজবংশী, ডিফুতে জয়রাম ইংলেং প্রতিদ্বন্দিতায় রয়েছেন। এই পর্যায়ে শিলচরে তৃণমূল কংগ্রেসের প্রার্থী প্রাক্তন সাংসদ রাধেশ্যাম বিশ্বাস, ওদালগুরিতে বিপিএফের দুর্গাদাস বড়ো ও করিমগঞ্জে এ আই ইউ ডি এফের নেতা সাহাবুল ইসলাম চৌধুরী প্রতিদ্বন্দিতায় রয়েছেন।

রাজ্যে লোকসভার পাঁচটি আসনের জন্য অনুষ্ঠিত প্রথম পর্যায়ের নির্বাচনের প্রচার অভিযান জোরদার হয়ে উঠেছে। প্রবীন বিজেপি নেতা তথা কেন্দ্রীয় স্বরাষ্ট্রমন্ত্রী অমিত শাহ আজ ডিব্রুগড় ও শোণিতপুরে আয়োজিত জনসভায় অংশ গ্রহণ করবেন। জনসভায় মুখ্যমন্ত্রী ড: হিমন্ত বিশ্ব শর্মা ও ডিব্রুগড় লোকসভা আসনের প্রার্থী তথা কেন্দ্রীয় মন্ত্রী সর্বানন্দ সনোয়াল উপস্থিত থাকবেন।

আম আদমী দলের নেত্রী অতিশী মারলিনা গতকাল ডিব্রুগড়ের দুলিয়াজানে আয়োজিত রোড শোতে অংশ গ্রহণ করেন। নেত্রী ডিব্রুগড় ও শোণিতপুর লোকসভা আসনের দলীয় প্রার্থী মনোজ ধানোয়ার ও ঋষিরাজ কৌন্দিন্যর হয়ে প্রচার করছেন। আজ তিনি তিনসুকিয়ায় সংবাদ মাধ্যমের সংগে মত বিনিময় করা সহ মার্শেরিটায় মটর সাইকেল র্যালিতেও অংশ নেবেন।

কংগ্রেসের রাজ্য সভাপতি ভূপেন বরা, জাতীয় সম্পাদক জীতেন্দ্র সিং ও যোরহাট লোকসভা আসনের প্রার্থী তথা সাংসদ গৌরব গগৈ আজ যোরহাটের বিভিন্ন স্থানে নির্বাচনী প্রচার অভিযানে অংশ নেবেন।

বিজেপির প্রবীন নেতা তথা মুখ্যমন্ত্রী ড: হিমন্ত বিশ্ব শর্মা গতকাল চরাইদেউ জেলার সোণারি বিধানসভা কেন্দ্রে যোরহাট লোকসভা আসনের প্রার্থী তপন কুমার গগৈর হয়ে প্রচার করেন। মুখ্যমন্ত্রী জেলার সাপেখাটি উচ্চতর মাধ্যমিক বিদ্যালয়ের খেলার মাঠে আয়োজিত সংকল্প সমাবেশে অংশ গ্রহণ করেন। ডিব্রুগড় আসনের প্রার্থী কেন্দ্রীয় মন্ত্রী সর্বানন্দ সনোয়াল গতকাল নবগঠিত মাকুম বিধানসভা কেন্দ্রে প্রচারে অংশ গ্রহণ করেন। এদিকে ঐ আসনের বিরোধী ঐক্যমঞ্চের প্রার্থী তথা অসম জাতীয় পরিষদের সভাপতি লুরিগজ্যোতি গগৈ গতকাল মার্শেরিটা

বিধানসভা কেন্দ্রে বেশ কয়েকটি প্রচার সভায় অংশ গ্রহণ করেন। তৃতীয় পর্যায়ের নির্বাচনের জন্য গৌহাটী আসনের প্রার্থী বিজুলী কলিতা মেধি গতকাল মহানগরের বিভিন্ন অঞ্চলে বেশ কয়েকটি প্রচার কার্যসূচীতে অংশ নেন।

এদিকে বরাক উপত্যকার তিনজেলায়ও ক্ষমতাসীন বিজেপি, বিরোধী কংগ্রেস, তৃণমূল কংগ্রেস সহ আন্যান্য রাজনৈতিক দলগুলি প্রচার অভিযান অব্যাহত রেখেছে।

ভারতীয় জাতীয় কংগ্রেসের করিমগঞ্জ জেলা কমিটি লোকসভা নির্বাচনের অংশ হিসেবে গতকাল জেলার কানিশাইল ও নিলামবাজারে দুটি নির্বাচনী কার্যালয়ের উদ্বোধন করেছে। উদ্বোধনী সভায় করিমগঞ্জ লোকসভা আসনের কংগ্রেস প্রার্থী হাফিজ রশিদ চৌধুরী, প্রাক্তন মন্ত্রী আব্দুল মুক্তাদির চৌধুরী প্রমুখ উপস্থিত ছিলেন।

অন্যদিকে জেলার নগেন্দ্র নগর গ্রাম পঞ্চায়েতে আয়োজিত নির্বাচনী জনসভায় ভারতীয় জনতা পার্টির মনোনীত প্রার্থী কৃপানাথ মালাহ-র সমর্থনে রাতাবাড়ীর বিধায়ক তথা বিজেপি নেতা বিজয় মালাকার একটি জন সভায় অংশ গ্রহণ করেন।

অসম জাতীয় পরিষদ লোকসভা নির্বাচনের জন্য গতকাল ডিব্রুগড়ে তাদের নির্বাচনী ইস্তাহার প্রকাশ করেছে। ইস্তাহারে অসমীয়া তথা রাজ্যের আন্যান্য স্থানীয় জনগোষ্ঠীর ভাষিক, সাংস্কৃতিক ঐতিহ্য সুরক্ষার পসঙ্গ সংসদে উপস্থাপন করা সহ এগুলি রূপায়ন করার ক্ষেত্রে জনমত গড়ে তোলার প্রতিশ্রুতি প্রদান করা হয়েছে। এছাড়া ইস্তাহারে সীমান্ত সুরক্ষা, ত্রুটিবিহীন জাতীয় নাগরিকপঞ্জী প্রস্তুত করার প্রতিশ্রুতি প্রদান করা হয়েছে। উল্লেখ্য দলটি ১৪ টি লোকসভা আসনের মধ্যে ডিব্রুগড় আসনে লুরিনজ্যোতি গগৈকে প্রার্থী করেছে।

করিমগঞ্জ জেলার মহিলা ভোট গ্রহণ কর্মী পরিচালিত ভোট কেন্দ্রের প্রিসাইডিং ও পোলিং অফিসারদের আজ করিমগঞ্জ বিরজা সুন্দরী গার্লস হাইস্কুলে একটি প্রশিক্ষণ শিবিরের আয়োজন করা হয়েছে। আজ বেলা ১১ টা থেকে দুপুর ২ টা পর্যন্ত চারটি কক্ষে এই প্রশিক্ষণ অনুষ্ঠিত হবে।
